



---

Komisija za očuvanje nacionalnih spomenika, na osnovi člana V stav 4. Aneksa 8. Općeg okvirnog sporazuma za mir u Bosni i Hercegovini i člana 39. stav 1. Poslovnika o radu Komisije za očuvanje nacionalnih spomenika, na sjednici održanoj od 04. do 08. marta 2003. godine, donijela je

## ODLUKU

### I

**Mjesto i ostaci graditeljske cjeline - Čaršijska džamija u Prijedoru,** proglašava se nacionalnim spomenikom Bosne i Hercegovine (u daljem tekstu: nacionalni spomenik).

Nacionalni spomenik obuhvata zemljište označeno kao k.č.br. 1860, k.o. Prijedor I, općina Prijedor, Republika Srpska.

Nacionalni spomenik obuhvata prostor džamije, harema i groblja uz džamiju.

Na nacionalni spomenik se primjenjuju mjere zaštite i rehabilitacije utvrđene Zakonom o sprovođenju odluka Komisije za zaštitu nacionalnih spomenika ustanovljene u skladu sa Aneksom 8. Opšteg okvirnog sporazuma za mir u Bosni i Hercegovini ("Službeni glasnik Republike Srpske", broj 9/02).

### II

Vlada Republike Srpske dužna je osigurati pravne, naučne, tehničke, administrativne i finansijske mjere za zaštitu, prezentaciju i rehabilitaciju nacionalnog spomenika.

Vlada Republike Srpske dužna je osigurati finansijske i tehničke uvjete za izradu i provedbu tehničke dokumentacije za rehabilitaciju nacionalnog spomenika.

Komisija za očuvanje nacionalnih spomenika (u daljnjem tekstu: Komisija) utvrdit će uvjete i osigurati sredstva za izradu i postavljanje informacione ploče sa osnovnim podacima o spomeniku i odluci o proglašenju dobra nacionalnim spomenikom.

### III

Vlada Republike Srpske dužna je posebno osigurati provođenje sljedećih mjera:

- graditeljska cjelina Čaršijske džamije u Prijedoru sa okolnim prostorom mezarja, bit će rekonstruirana u izvornom obliku, iste veličine (11,30 mx19,70 m), od istog ili istovrsnog materijala, primjenom istih tehnoloških pristupa u mjeri u kojoj je to moguće, a na osnovi dokumentacije o njenom izvornom obliku koja je sastavni dio ove odluke ;

- džamija će biti pomjerena prema sjeverozapadu u odnosu na izvornu lokaciju, u skladu sa skicom koja je sastavni dio ove odluke; izvorna lokacija džamije bit će naznačena u obradi partera džamijskog harema i pješačke saobraćajnice;
- dio katastarske čestice na kojoj se nalazila džamija i koji je sada sastavni dio pješačke saobraćajnice bit će naglašen u gradskom podu različitom vrstom popločanja; sa dijela mezarja koji je pretvoren u pješačku saobraćajnicu bit će uklonjeni slojevi koji prekrivaju tlo; mezarje će biti ograđeno prema granicama zemljišta koje je obuhvatalo prije 1992. godine;
  - svi ulomci džamije koji su ostali nakon rušenja na njenom prostoru ili na deponijama na koje su odvezeni nakon rušenja, uključujući i nadgrobne kamenove koji su odvezeni na deponiju Pećani, bit će snimljeni, konzervirani i ponovno ugrađeni u rekonstruirani objekat džamije;
- svi ulomci koji su nađeni, a koje, s obzirom na stepen oštećenja ili iz drugih opravdanih razloga, nije moguće ugraditi, bit će prezentirani na odgovarajući način u sklopu džamijske cjeline;
- prije početka rekonstrukcije potrebno je izvršiti otkopavanja površinskih slojeva zemlje u cilju pronalaženja originalnih temeljnih zidova, te izvršiti njihovo detaljno snimanje, doziđivanje, ukoliko je to neophodno, i obilježavanje u nivou podne ravni pješačke saobraćajnice i džamijskog harema;
- sve dijelove za koje ne postoji pouzdana dokumentacija riješiti u sklopu projekta na način kojim će se osigurati čitljivost njihovog interpoliranja;
- svi nađeni dijelovi nišana bit će prezentirani na dijelu cjeline na kome su prije rušenja bili mezarovi;
- s obzirom da je dio graditeljske cjeline džamijskog harema pretvoren u pješačku saobraćajnicu, neophodno je izvršiti dokompletiranje parcele u vlasništvu Islamske zajednice površinom sjeverno ili sjeverozapadno od džamije, koja odgovara izuzetom zemljištu;
- minimalna udaljenost novih objekata na susjednim parcelama od translatorno pomjerenog objekta džamije je 6 m;
- maksimalna spratnost novih objekata na susjednim parcelama je P+1, sa maksimalnom visinom krovnog vijenca 6 m;
- nije dopušteno nadziđivanje niti povećanje visine postojećih objekata na susjednim parcelama.

#### IV

Stavlja se van snage Regulacioni plan centralne zone Prijedora sa spomeničkim kompleksom iz 2000. godine, u dijelu u kojem je on u suprotnosti sa odredbama ove odluke.

#### V

Svako, a posebno nadležni organi Republike Srpske, gradske i općinske službe suzdržat će se od poduzimanja bilo kakvih radnji koje mogu oštetiti nacionalni spomenik ili dovesti u pitanje njegovu zaštitu i rehabilitaciju.

## VI

Ova odluka dostavit će se Vladi Republike Srpske, ministarstvu nadležnom za prostorno uređenje u Republici Srpskoj i nadležnoj službi zaštite naslijeđa na nivou Republike Srpske, općinskom organu uprave nadležnom za poslove urbanizma i katastra, radi provođenja mjera utvrđenih u tač. II - IV ove odluke i nadležnom općinskom sudu radi upisa u zemljišne knjige.

## VII

Sastavni dio ove odluke je obrazloženje sa pratećom dokumentacijom, koje je dostupno na uvid zainteresiranim licima u prostorijama i na web stranici Komisije (<http://www.aneks8komisija.com.ba>).

## VIII

Prema članu V, stav 4. Aneksa 8. Općeg okvirnog sporazuma za mir u Bosni i Hercegovini, Odluke Komisije su konačne.

## IX

Ova odluka stupa na snagu danom donošenja i objavit će se u «Službenom glasniku BiH» i «Službenom glasniku Republike Srpske».

Ovu odluku Komisija je donijela u sljedećem sastavu: Zeynep Ahunbay, Amra Hadžimuhamedović, Dubravko Lovrenović, Ljiljana Ševo i Tina Wik.

Broj: 07-6-145/03-3  
05. marta 2003. godine  
Sarajevo

**Predsjedavajući Komisije**

**Dubravko Lovrenović**